

Les fôles di Coénat

Mon père était blanchie. C'ment qu'èl aivait predju lai vue, èl é daivu aibaind'naie son métié. Â tchâtemps, è péssait s'vent sai vâprée ch' le baintc â d'vaint l'heus en compaignie d'în véye di Coénat.

Le véye, que s'aipp'lait Adolphe, était pus coégnu poi son sobritçhèt. An yi dyait *le Pilome*. I n'aî djemais saivu lai réjon de ci churnom. Le Pilome était pus véye que mon père. Èl aivait échploité lai cairiere di Coénat d'vaint que d' péssaie lai main è son boûebe. È s'était fait quéques sos en fabriquant des *plots*, ènne soûetche de brityes en ciment qu'è livrait és entreprenous. Dains note care de tiere, an trovait les plots di Pilome ïn pô tot poitchot, dains les novèlles et coquettes mâjps des pierrichtes, ces novés rétches, dains les étales rénovées, dains les leudges des pâitures, dôs les ponts de graindge.

Ch' le baintc d'vaint l'hôtâ, l'Abel le blanchie, èt l'Adolphe le carrie-briquetyie, évoquyînt le péssè. És raicontînt sains râtaie. Des hichtoires d'în âtre temps, çtu de yote djûenence, des hichtoires de dains le temps, d'în temps qu'ès n'aivînt p' poéyu coégnâtre yos-meinmes, mains qu'ès en aivînt oûyi djâsaie és lôvrées.

És aindges, i les oûyais étchaidngie en patois èt se piedre dains des fôles laivou qu'èl était maléjie de démêlaie le vrâ di fâ. Ènne hichtoire en aipp'lait ènne âtre :

- È di Djulat, te t'sovîns ?
- Eh bîn, çtu-ci c'était ïn fend-l'oûere.
- Bracoénou èt contrebandie.
- I t' veus dire, moi, c'ment qu'èl é fini.

Dînce, de vâprée en vâprée, nos dous contous traicînt les grants môments de l'hichtoire : le Sondrebond, l'année d' lai sâtchie, le Kulturkampf, lai grippe de dieche-heûte.

I m' sovîns qu' le Pilome, po bèyie en ses hichtoires l'imaidge de lai voitè, finichait aidé dînce : « Èt peus çât qu'ât vrai. »

Chu ci baintc d'vaint l'hôtâ, nos dous compéres ref'sînt le monde. És seuv'niainces di péssè cheuyînt les musattes, des côps sérieuses, ch' lai fé, ch' lai politiye. Lai politiye aidjolate, bîn chur, lai seule ïntéressainne, çtée que drassait dains des graingnes sains pidie les Roudges contre les Nois.

Çt'Abel èt çt'Adolphe musĩnt des hoûeres entieres. En lai carriere di Coénat, ène brijoure de pieres f'sait ĩn traiyĩn di diaile. Lai preusse è plots f'sait trembyait le sô. Sains râte, les griyats f'sĩnt yos cricris dôs le s'raye di tchâtemps. Les rûes ençâchées d'ĩn tchie è étchiele sâtĩnt ch' lai vie.

Mon père était craiyaint. Le Pilome, lu, se dyait sains r'ligion.

- I n' crais ne en diaĩle ne en Dûe, qu'è s' pyaijait è dire.

Lai musatte de sai fĩn chu tiere ne yi f'sait pe pavou.

- Tiaĩnd qu'i sentiré lai moûe v'ni, qu'è dyait, i m' veus trĩnnaie djuqu'en lai Vouâvre. Te sais, le grant tcheĩne que fait l'andye, i veus y çhoulaie mes drieres v'lantès graiy'nèes chu ĩn cairton. Èl ât dje tot prât. I m' veus sietaie â pie d' ci tcheĩne, i veus çhoûere les eûyes èt peus i veus aĩttendre. Çtu que m' trov'ré diré « Voili l' Pilome que doûe. » Peus è yéré chu mai pancarte : Entierèz-me ci. È me ch'couéré. « Crais bĩn qu'èl ât moûe. » Peus è ritt'ré â v'laidge de tote lai vitesse de ses sabats.

Le véye Pilome ât moûe dains son yét. Sai fanne é fait v'ni l' tiurie.